



Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

14 Juillet 2017

(19 Shawwal 1438 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor « Commentaire de Surah At-Tin (Ch.95) - 1^{er} Partie »:

بِسْمِ اللَّهِ الرَّحْمَنِ الرَّحِيمِ ۞ وَالتَّيْنِ وَالزَّيْتُونِ ۞ وَطُورِ سَيْنِينَ ۞ وَهَذَا الْبَلَدِ
الْأَمِينِ ۞ لَقَدْ خَلَقْنَا الْإِنْسَانَ فِي أَحْسَنِ تَقْوِيمٍ ۞ ثُمَّ رَدَدْنَاهُ أَسْفَلَ سَافِلِينَ ۞ إِلَّا الَّذِينَ
آمَنُوا وَعَمِلُوا الصَّالِحَاتِ فَلَهُمْ أَجْرٌ غَيْرُ مَمْنُونٍ ۞ فَمَا يُكَذِّبُكَ بَعْدُ بِالذِّكْرِ ۞ أَلَيْسَ اللَّهُ
بِأَحْكَمِ الْحَكَمِينَ ۞

1. Bismillah-ir-Rahmaan-ir-Rahiim.
2. Wat-Tiini waz-Zaytuuni,
3. Wa Tuuri siiniina,
4. Wa haazal-Baladil-'amiin,
5. Laqad khalaqnal-'insaana fiii 'ahsani taqwiim,
6. Summa radadnaahu 'asfala Saafiliin,

7. 'Illal-laziina 'aamanu wa 'amilus-saalihaati falahum 'ajrun ghayru mamnuun.

8. Famaa yukazzibuka ba'-du bid-Diin?

9. 'Alay-sallaahu bi-'Ahkamil-haakimiin?

« Au nom d'Allah, Le Très Gracieux, Le Très Miséricordieux; Par figue et zolive, Par Montagne Sinäi, Et par sa la ville en sureté là, Nous fine vraiment créer dimoune dans ene plus joli forme, Mais ensuite Nous retourne li dans fond, le plus bas, Excepté bane ki gagne la foi et faire le bien, Parski sa bane là pour gagne ene récompense sans arrêt. Pour ki raison, après sa, to refuse accepter ki pou ena jugement? Eski c'est pas Allah Le plus sage des juges?» **(À la fin, nous réponde: Bala! Wa ana ala Zaaleka minash Shahideen - « Oui, Moi aussi mo parmi bane ki témoigne de sa »).** (At-Tin 95: 1-9).

À la lumière de sa bane versets là, nous trouvé ki tous séki ena dans la nature, fine créer pour l'épanouissement de l'homme dans tous so l'aspect. À travers la révélation divine, nous fine apprane ki Allah fine créer l'homme dans le meilleur de bane formes. Et nous fine apprane aussi ki soit li capave vine aussi pire ki ene zanimal ou bien li capave parfaire li moralement et spirituellement et arrive à ene haute stage kot li vine pli près avec Allah, et li arrive à sa l'état là kan li réaliser ki ena ene seul Dieu et ki tous séki ena lor sa la terre là et dans l'univers et même li-même, tous appartenir à Allah, et li faire zéffore pour plaire à Allah et vine proche de Li. Quand li faire sa zéffore là pour approche Allah, li cultive l'amour d'Allah et le respect et la crainte d'Allah (*Taqwa*); et tous sa là faire li sorti de so l'état animal et vine à l'état morale et spirituel.

Quand li dans sa l'état morale là, li développe bane excellent caractère kot li agir avec bonté et sagesse et li accompli bane actions afin ki li réussi atteindre so but. Personne à part Allah conne so lé cœur et li pas capave cachiette nannié à Allah et le Jour du Jugement, c'est Allah Le plus Sage, Le plus Juste ki pour juge li et si li pas ti ena sincérité dans so lé cœur et li ti pé faire sa bane actions là zis pour lizié dimoune, alor so punition pour bien grave et rempli de douleur pour li. Mais si li ti sincère envers Allah et li ti ena ene lé cœur pure et propre, alor so valeur devant lizié d'Allah pour augmenter et so récompense pour ene récompense éternel.

Allah Li-même fine donne nous (l'homme) le choix pour choisir nous chemin, sois nous choisir pour attacher avec sa le monde là et vine pli bas ki ene zanimal, sois nous délaisse l'attraction de sa le monde là et nous attache nous-même fermement avec Allah kot nous choisir pour faire progrès morale et spirituelle pour gagne Allah seulement. Nous pour capave arrive à sa haute degré morale et

spirituel là seulement en obéissant Allah complètement et quand Allah manifester Li à n'importe ki moment, et ki l'heure, nous bizin attrape fort la corde d'Allah et suivre So bane l'instruction et So guide afin ki Allah satisfait avec nous et nous aussi nous satisfait avec Li (Allah).

L'homme fine gagne ene supériorité lor l'animal. L'homme, li ena pouvoir de raisonner et li ena la capacité pour prend ene décision tandis ki zaimo là, li baze li seulement lor so l'instinct. Alor l'homme li bizin servi sa capacité ki li ena pour raisonné et prend décision là afin ki li quitte so l'état animal pour arrive à ene l'état pure, morale et spirituel. Sa li pas faire ene seconde, ene minute ou sois ene jour sa. Sa procès là li faire graduellement (au fur et à mesure ki l'homme prend conscience de la présence d'Allah et li gagne ene certitude absolu (complet) kot péna aucaine doute ki Allah, Li ene seul (Unique)).

La raison, l'intelligence li ene cadeau d'Allah ki permette nous faire différence entre le bien et le mal. Et li aide nous pour comprend bane commandements ki Allah fine mette dans le Quran et Li (Allah) faire nous comprend à travers le Quran même, ki si nous servi nous logique (raisonnement, intelligence) et de nous bane connaissances, sa pour aide nous pour pli comprend bane commandements d'Allah et après sa, pour conduire nous bien d'après sa bane l'enseignements parfait là.

L'essence de sa Surah là li trouve dans so bane versets 5-9 et li mette de l'avant (ene serment) ki contenir 4 symboles sacré, c'est-à-dire, figue, zolive, Mont Sinaiï et la Ville Sacré de Makkah. Pour l'interprétation de sa premier symbole là, c'est-à-dire, figue.

1. **Wat-Tiini waz-Zaytuuni (Par figue et zolive)**

(a) Figue. Si nous considère le mot figue littéralement comme étant le fruit, ou pié ki rapporte sa fruit là, sa même symbole là (figue) capave représente destin de l'homme dans plusieurs l'aspects. Si traite li bien, cultive li bien, li capave vine le meilleur de bane fruits, ki pli délicieux (ena bon goût) et ki pli nourrissant ki bane lézot fruits.

Quand sa fruit là (figue) li encore à l'état sauvage, li ena bane bien tipti la grain et aussi li capave gagne ene tas ti bébéte. Pareil coumsa, l'homme capave construire pour li-même ene bon destin si li conne mette en valeur, tout saki bon en li. Mais si li suivre bane mauvais ki en li, li vine sa créature ki pli bas et ki bien dégoûtant là

kot tellement so l'état empiré ki li vine pli bas ki ene zanimo (kot zanimo vine pli bon ki li!).

Fine rapporté ki Jésus (as), pour faire dimounes comprend sa même leçon là, fine maudit ene pié figue (figuier) ki ti ena zis feuilles et ki pas ti pé rapporte fruits (Matthieu 21: 18-20).

(b) Et par zolive. Zolive li ene symbole sacré et nous trouvé dans chapitre 23, Al-Muminuun, Verset 21 dans Quran ki Allah fine faire pousser dépi lor Montagne Sinaï sa pié ki produire le meilleur de l'huile ki ena goût et parfum exceptionnelle.

Dans Surah An-Nur aussi (Chapitre 24, Verset 36), Allah donne ene parabole, kot la lumière divine ena référence avec zolive, et pié zolive fine mentionner comme étant ene pié sacré kot ene zétoile brillé et ki zamais pour arrête brillé parski li appartenir ni à l'Orient et ni à l'Occident (Li appartenir ni de l'Est, ni de l'Ouest). Sa la lumière là li capave faire référence à la lumière du Quran ki fine déssane comme la révélation par excellence au Saint Prophète (saws) et ki sa même Livre là, li ene guide, pas zis pour ene létemps, mais li pour tous l'époques et li pour durer ziska le jour du jugement et so bane l'enseignements pour bane l'enseignements universel kot zot pou applicable pour zot tous lor sa la terre là et partout kot so la lumière pour filtré.

Comme explication de sa Surah là li bien étoffé, *Insha-Allah*, Vendredi prochain mo pou contigne so explication. Ki Allah aide nous tous pou bien comprend sa bane explications là afin ki l'essence de bane parabole d'Allah ki Li fine enseigne nous dans Quran, et en particulier dans sa Surah là, li aide nous pou parfaire nous moralement et spirituellement afin ki nous réussi sorti de l'état animale et vine de plus en plus vers le perfectionnement de nous l'âme, et de sa façon là nous vine pli près avec Allah, plisse ki avant. *Insha-Allah, Ameen.*